
БОШОҚЛИ ДОННИ ЭКИШ

Бу муҳим агротехник тадбир ўз вақтида ва сифатли ташкил этилиши зарур

Сентябрь ойининг дастлабки кунларида вилоятимизнинг барча ҳудудларида кузги бошоқли дон экинларини экиш мавсумини белгиланган агротехник тадбирлар талаблари асосида ташкил этиш мақсадида амалий семинарлар бўлиб ўтди.

Вилоят ҳокимлиги ташаббуси билан ўтказилган амалий семинарларда қишлоқ хўжалиги соҳасига дахлдор корхона ва ташкилотлар раҳбарлари, олимлар, отрядларга бириктирилган масъул ходимлар ва фермерлар иштирок этишди. Семинарлар давомида мутахассислар томонидан фермер хўжаликларига керакли тавсиялар берилиб, бошоқли дон экиш мавсумини сифатли ўтказиш бўйича амалий машғулотлар ташкил этилди.

2018 йил ҳосили учун вилоятимизда 109 минг 200 гектар майдонга “Асп”, “Яксарт”, “Замин-1”, “Дурдона”, “Бардош”, “Таня”, “Гром” каби навларни экиш режалаштирилган бўлиб, бунинг учун етарли миқдорда уруғлик захираси яратилди, дейди Ўзбекистон қишлоқ хўжалиги илмий ишлаб чиқариш маркази Фарғона вилоят бўлими бош мутахассиси Одилжон Салайдинов. – Бу навлар вилоятимизнинг тупроқ ва иқлим шароити, сув билан таъминланганлик даражаси ҳамда биологик хусусиятларига қараб жойлаштирилади.

Бошоқли дон экинлари очиқ майдонларда СЗТ-3,6, СЗУ-3,6 русумли экиш сеялкаларида, ғўза қатор ораларига махсус сеялалар ва КРХ-4,2 русумли культиватор экиш мосламасида экилади. Ҳудудларнинг табиий иқлим шароити ва навларининг биологик ҳолатига қараб қуйидаги меъёрларда уруғ сарфланади:

эртаги муддатда – 220-230 кг/га;

ўрта муддатда – 230-240 кг/га;

кечки муддатда – 250 кг/га. Экиш чуқурлиги ўртача 3-5 см ни ташкил этиши лозим.

Вилоятнинг унумдорлиги юқори ерларида уруғни 3-4 см, қумли ерларда 4-5 см чуқурликда экиш, шамол таъсирида бўлувчи ва қор нисбатан кам ёғадиган Қўқон гуруҳи туманларида буғдой уруғини Фарғона гуруҳи туманларига қараганда 1 см чуқурроқ экилса, майсаларни қишдан беталофат, совуқ урмай чиқиши таъминланади.

Уруғ экилганидан кейин бир текисда ундириб олиш учун меъёрида суғорилади. Биринчи сувдан сўнг 7-8 кун ўтгач, уруғ тўлиқ униб чиқмаса, такрорий суғоришни ташкил этиш керак. Суғориш шарбат усулида амалга оширилади. Бу усулни қўллаш ғаллани макро ва микроэлементларга бўлган талабини қондириш билан бирга мулча вазифасини бажаради ҳамда сувнинг буғланишини камайтиради ва унинг тупроққа сингишини яхшилади.

Ўз навбатида вилоятимизнинг Марказий Фарғона, Қолгандарё массивларининг ерлари шўрланган майдонларини қиш чилласида чилла суви билан қондириб суғориш ушбу майдонларнинг шўрланиш даражасининг пасайишига ва шўр ювилишига хизмат қилади. Бошоқли донни экишда мазкур тавсияларга амал қилиш шартномада белгиланганидек мўл ва сифатли ҳосил олишга кенг шароит яратади.

2017-09-12 11:32:10